

Prvi zamjenik visokog predstavnika i supervizor za Distrikt Brčko Scanlan u posjeti Banja Luci



Prvi zamjenik visokog predstavnika i supervizor za Distrikt Brčko, Michael Scanlan, danas je posjetio Banja Luku i sastao se sa Lukom Petrovićem, generalnim direktorom Elektroprivrede RS (EPRE), te Krešimirom Šoljićem, direktorom Agencije za osiguranje depozita BiH.

Na sastanku sa Lukom Petrovićem, kao i na sastanku sa generalnim direktorom Elektroprivrede BiH Bajazitom Jašarevićem početkom ove sedmice, prvi zamjenik visokog predstavnika i supervizor Scanlan razgovarao je o značaju očuvanja pouzdanog elektrosnabdijevanja Brčko Distrikta, kako za svakodnevni život građana, tako i za promociju Distrikta kao mesta pogodnog za poslovanje i investicije. U oba slučaja, Scanlan je izrazio zadovoljstvo sadržajnošću i nivoom profesionalnosti sastanaka.

Tokom sastanka sa direktorom Šoljićem, prvi zamjenik visokog predstavnika je podcrtao ključnu ulogu koju je Agencija za osiguranje depozita BiH imala u očuvanju stabilnosti cjelokupnog finansijskog sistema tako što je jačala povjerenje javnosti u bosanskohercegovački bankarski sektor.

„Obavezno osiguranje depozita do 50.000 KM za građane, te mala

i srednja preduzeća u slučaju likvidacije njihove banke, dragocjen je zaštitni mehanizam koji omogućava predvidljivost u životima građana te u poslovanju.

Predvidljivost podstiče štednju i doprinosi jačanju kapaciteta banaka za kreditiranje, što je od životnog značaja za svaku tržišnu ekonomiju. Dokazana efikasnost i profesionalnost Agencije u osiguranju depozita širom BiH najbolji je primjer institucije na državnom nivou koja radi za dobrobit svih građana.

Imajući sve to na umu, neophodno je uvijek isticati značaj očuvanja pune nezavisnosti i profesionalnih standarda ove institucije,” rekao je prvi zamjenik visokog predstavnika.